

COMUNICATO n. 1213 del 20/05/2025

Zuazoln ver 3,2 milionen va euro. Der assessor Failoni: “Hilf pet an sozial gilt ont ver za gem bèrt en de lòntschòft”

Hilf ver en auzign en pèrg ont ver za schutzn de biodiversitet va de lòntschòft, vrong vour de 30 van prochet

[Mòcheno] S hòt zait finz as de draisk van prochet ver za stelln vour de vrong asn bando enviretrong va de Provinz ver za schutzn ont bèrt gem en de lòntschòft ont en de hirtschòft. Pet an total va 3,2 milionen va euro, de doi hilf billt envire trong de projektn as belln verpersern de glaichkait zbischn de birtschòftbèrk, de lòntschòft ont s derhòltn va de biodiversitet van vicher ont van plòzn. “Pet de doi hilf - sok der provinzal assessor en de balder, der Roberto Failoni - bill ber birkle hèlven ber as lep ont òrbetet en de insertn pèrng, asou za derkennen s umbèltgilt ont s sozialgilt va de hirtschòft”. Der bando mòcht toal van Stòttstrategischeplan va de PAC 2023-2027, ont ist zuazolt va de Europäische Union turch der europeische lòntschòft zuazol ver en lòntverperser (Feasr), van Stòtt en de autonome Provinz va Trea’t.

De zuazoln kearn en de lòntschòft as verpersert de umbèlt, iberhaup sèll as keart en derhòltn van natural habitat, en de pahòtlechkait van lònt ont en zòmlem van vèltbèrk ont van billvèlt.

S kemmen u’ganommen de òrbetn ver za meing prauchen s bòsser en pèrg, abia de balder, de vòssn, de zisterne ont de trenker, s sai’ inngahòltn de innrichtn va plòznrain. Men stitzt nou s vernaiern van pèrgbisn as sai’ semm galòck kemmen ont s verpersern van habitat va de nèt Natura 2000. Der bando untestitzt de zai’ va holz ont de konservativ ausricht van sèlln va stoa’, derzua benns men bill van pa’mblerzai’ oder plòznzai’, asou abia naia elektresche innrichtn ver za schutzn de vicher van vlaischvrèsser ont strukturn ver za schutzn de haisler van painkastler (Bienenhaus).

Der paitrog luckt der 70% van kost as kimmip u’ganommen finz as nèt mearer abia hundert tausnt euro ver vroger, prozent as mu’ kemmen gaheift finz as 80% benns sai’ òrbetn tschbunnen van balderschòftn. S meing vourstelln de vrog de pauern ont de sèlln as prauchen s vèlt, as de meing sai’ òllgamoan oder privatn aa, ont nou pauern, de sèlln as pain hom, ont de schòftn ont de konsorzi aa.

De vrong meing kemmen vourstellt lai online vour de 30 van prochet 2025, turch an portal van provinzal lòntschòft informatische sistem SRTrento, van adress <https://srt.infotn.it/> oppure tramite il sito <https://a4g.provincia.tn.it/>.

Òlla de nochrichtn konn men sa vinnen as de istituzional sait van Balder Dinst (<https://forestefauna.provincia.tn.it/Foreste/Attivita-forestali/Contributi-allo-sviluppo-rurale-PSP-2023-2027>)

Ibersetz gamòcht van Sprochtirl va de Tolgamoaschòft Hoa Valzegu' ont Bersntol

(cdt)

